



Subit se pensa a quela dei soldai
che i porta sul capel 'na penna nera:
i nossi alpini sempre 'nnamorai
de la so Italia e de la so bandera.

Chi èl no l'ha sentida? Su 'na strada
de 'n paesot sperdù fra le montagne
eco passa la banda, en poc stonada,
ma no ghe n'è al mondo de compagne.

Prima se sente i colpi dei tamburi,
come smorzadi en mez a la gran chiete,
dopo riva i tromboni pù sicuri
e a la fin, zò 'na steca, le cornete.

Riva anca lori, i "veci" en grigioverde,
tutti i bate le man, i bocci drio:
e drio l'angol le note le se perde
ed del ciel, sù, fin al Sioredio.

Ma, arent a quela eterna dei alpini,
gh'è n'altra banda che ne toca el cor,
che la desmissia grandi e picenini
e anca l'anzolim sora la tor.

La pol esser en fasse, zovenota,
madura come quela dei rivani,
che 'n de l'otantasei, tegnendo bota,
l'ha tocà i so zentoquarantani.

Banda del me paes, musica cara,
sentida prima en braz a me papà,
banda del me paes, musica rara,
mi no t'ho de sigur desmentegà.

Te me vegnive 'ncontro i di de festa,
quan che neva a la prima comuniom;
mi scolteva coi oci e la me testa...
la me testa la neva a scorlandom.

Ti te steve davanti a le sfilade
quan che mi s'era zà 'n marinaret
e la not, fra le case 'mpisolade,
mi te sentiva ancora, en del me let.

L'era i bei tempi che se neva a scola,
che se meteva l'ua 'n de le conzal;
e co le spade a punta de stagnola
se zugheva ai putei de la Via Pal.

Te feve 'improvisade i di de noza,
prima che i sposi i nesse via de trot;
po', coi gradi de qualche bona boza,
te podeve sonar for per la not.

Te feve serenade al ciar de luna,
mezza scondù 'n de l'ombra dei portoni:
en popo l'era nat, sora la cuna
ai sposi ghe sponteva i lagrimoni.

I unici a brontolar l'era i 'nquilini
che abiteva la casa de le prove,
ma, pù de spes, i ciameva i vizini
per scoltar... el concerto de le nove.

Tutte le feste grande, aniversari,
partenze, arivi, storie del comun,
poeti; artisti, atleti, marinari:
no te lasseve fora mai nissun.

E quan che qualchedun el se fermeva
al punto en do che tutti sem listessi,
ensema a la to zent che se strucheva
te 'l compagneve, a piam, soto i zipressi.

Cossita l'è anca ades, musica cara
sentida prima en braz a me papà,
cossita l'è anca ades, musica rara,
e cossita, sperem, sempre 'l sarà.

Banda del me paes, musica bela,
che te me ciape co la nostalgia,
quan che dovrò tornar su la me stela
e restarghe per sempre, mi vorria,

se no domando massa, quasi come
mi podesse parlar a na putela:
l'ultima volta, fame compagnia.

Enrico Rossaro

21 settembre 1986

RIVA DEL GARDA,
nel centoquarantesimo anniversario della nascita del
primo corpo bandistico cittadino.